

Pressiteedüs 20.01.2010

## II Uma Pido memm Marje Metsur valisi täämbä Põlvan nuuri hindäle appi pito juhtma

20. jaanuarin oll Põlvan konkurss, kon II Uma Pido memm-pidojuht Marje Metsur valisi pidoaos hindä kõrvalõ kats koolinuurt – Erki Limbaku ja Lauli Otsari.

Konkurss pido juhtõ valimisõs koolilatsi hulgast kõrraldõdi Uma Pido lavastaja Raivo Trassi mõttõ pääle: "Ma tahtsõ valli' pido memme Marje Metsuri kõrvalõ üte tütrigu ja üte poiskõsõ, kiä julgusõ' suurõ rahva iin üles astu ja pidävä' võro kiilt umas," üt'el' Trass.

Konkursilõ tulõkist andsõ kõrraldajilõ teedä' 16 poiskõist ja tütrikku vanussõn 10-17 aastakka. "Kõigi nuuri inemiisi silmä' säräsivä', võro kiilt kõnõli' nä kah kõik häste ja peris rassõ oll' otsusta, kedä valli'," võtt' pido memm Marje Metsur konkursi kokko.

Latsil pallõdi esitämises ette valmista' kats luulõtust etteantu nimekiräst. Kiä tahtsõ, võisi viil mano valli' luulõtusõ, laulu vai lühkü jutu, miä tälle hindäle lihtsähe väega miildüs. Muidoki olli' kõik konkursil ettekantu teksti' võrokeelitse'. Avvuhinduga tennäti kõiki, parõmbilõ pand' konkursi tugõja tiatri Vanemuine vällä tiatripiletiid.

Valiku teivä' Marje Metsur ja Raivo Trass üten muu žüriiga, kon olli' viil Helje Põvvat (Põlva Maavalitsuse rahvakultuuri peaspetsialist), Tarmo Tagamets (I Uma Pido lavastaja, Võru Linnateatri kunstiline juht) ja Aapo Ilves (laululuuja).

"Mõnus kodonõ tunnõ oll' esinedä," võtsõ üts võitjist, Lauli Otsar, konkursi kokko. "Suurõ rahva iin ülesastminõ Umal Pido hirmuta-i minno sukugi," kõnõl' tõnõ võitja Erki Limbak Umal Pido üle 6000 inemise iin esinemise kottalõ.

Võrokeeline laulu- ja rahvapido Uma Pido tulõ seo kevväi tõist kõrda. Edimäne pido oll' 20. mail 2008 Võrol Kubija laululava pääl. A aoluulinõ võro keele ja kultuuriruum om suurõmb ku Võro maakund, tuuperäst om tõnõ pido Põlvan. Pidoõ oodõtas pia 3000 lauljat üle kogo Lõuna-Eesti, a ka muialt Eestist, niisamatõ tulõ küläliisi välismaalt. Päält hariligõ kuurõ tulõva' pidoõ projektkoori' "Naasõ nurmõlt" ja "Mehe' mõtsast", miä pantas kokko lauluhimoliidsist naisist ja miihist, kiä külh egäpäävätselt kongi laulman ei käü', a "mobilisiirvä'" hinnäst võrokeelitses pidos. Pia kutsutas elolõ ka "kunnakoori'", midä härgütedäs kokko pandma pere-, sugu-, sõprus- ja kogokundõ ja miä saava' pidoõ laulda' ütiskuurõ jaon.

Mari-Liisa Parder

5052517

Uma Pido kommunikatsioonijuht

[www.umapido.ee](http://www.umapido.ee)

Triinu Ojar

533 22 153

Uma Pido projektijuht